

HEADLINES (EVENING)

Date – 30/06/2024

Time - 18:30 Hrs

1. Central Young Lai Association (CYLA)-in Myanmar lama phurh luh tur petrol leh diesel phurte chhun-zan-zawmin an dang chhunzawm zel.
2. Vawiin hi MNF leh sorkar laipui-in remna thuthlung an ziah champhaphak a ni.
3. Prime Minister Narendra Modi-a'n ram mipui-ten ram Danpui leh democracy kalphung an ring ngam tih an lantir thar leh chu lawmawm a tih thu a sawi.
4. ICC T20 Cricket World Cup-ah India an champion.

<><><>

EMBARGO

Central Young Lai Association (CYLA)-in kar kal ta Thawhtanni atang khan Myanmar lama phurh luh tur petrol leh diesel phurte chhun-zan-zawmin an la dang chhunzawm zel.

CYLA general secretary Pu Joseph Lalhmingthanga Chinzah chuan Aizawl, Lunglei leh Hnahthial atanga Lawngtlai district kal tlanga Myanmar lama diesel leh petrol phurh luh tumte chu Police bakah YLA mi tlawmngaite'n chhun zan zawmin hmun hrang hrangah an la dang niin a sawi a. Petrol pump 4 awmna Lawngtlai khawpui bakah Sangau leh Bungtlang South a filling station awmte atanga Myanmar lama petrol leh diesel phurh luh khap a ni bawk. Hetianga Myanmar lama to tak taka hralh tur petrol leh diesel phurh luh hi an khap chhung chuan a veng turin an duty thu CYLA hruaitute chuan an sawi. Kar kalta Thawhtanni khan CYLA chuan Myanmar lama bungrua, a bik takin petrol leh diesel phurh luh hi tiam chin awm lova an khap thu an chhuah a. A hlawm a petrol leh diesel tam tham tak taka phurh chhuah a nih avang hian mipui mimir leh Lawngtlai district a hmasawna hna thawktu company leh contractor-te'n harsatna an tawh phah nasa hle niin an sawi a. Hei bakah hian Myanmar a mipui rorelna din tura Chin pawl indinte chu hetiang eitur leh petrol leh diesel lo hmangtu Arakan hel pawlte'n lo rap betin an kap thin a. Ti tawh lo tura an tih hnu pawhin an sim duh chuang lo a ni, an ti.

A hma May ni 25 khan Myanmar a bungrua, a bikin petrol leh diesel thawn luh hi CYLA te chuan an lo khap tawh a. Arakan Army leh United League of Arakan (ULA) hruaitute nena an inbiak hnu-ah June ni 11 khan bungraw phurh luh khapna hi hlih a ni a. Mahse, Arakan hel pawlte hian an intiamna ti hlawhtling lova Chin state chhim lama Chin pawlte an la kah zui zel avangin June ni 24 atang khan bungraw laklul hi khap chhunzawm leh a ni ta a ni. Lunglei district DCSO leh Siaha district bawrhsap pawhin petrol leh diesel man to zawka hralh leh tura lei khawl vak vak khapna hi an lo chhuah tawh a. Hei hi mipui leh hmasawna hnathawktu company liante'n harsatna an tawh nasat vang niin an sawi a ni.

Lawngtlai district atanga petrol leh diesel phurte hian Kaladan Multi Modal Transit Transport Project (KMMTTP) kawngpui zawhin Hruitezawl khua-ah an inpechhawng tlangpui ni-in an sawi a. Siaha district atanga phurte chuan Tipa (Tuipang) lam panpui-in Lungpuk piah Salechhuah khua chu an inhlanhhawna hmun deuh ber a nih thu an sawi bawk. Petrol leh diesel man to zawka hralhtute hian plastic barrel litre 230 leh 240 inkar vel lengah litre 220 an thun tlangpui a. Hetiang plastic barrel hi 'PVC drum' emaw 'Oil drum' emaw tiin an sawi mai a. Tunhma a bur khat cheng 1,300 a an lei thin kha mamawhna a san tak avangin cheng 2,700 te a kai a, tunah hian cheng 2,000 velin an hralh tlangpui a ni.

HetiHLai hian Siaha district a pawl lian ber MTP chuan CYLA-in inbiakna pawh awm lova petrol leh diesel Siaha district atanga Myanmar lama phurh luh an khap chu an lungawi loh thu an sawi ve thung a. Siaha district atang chuan Myanmar lamah phurh luh reng a la nih thu dawn a ni. Chin state chhimlama inkulh Arakan hel pawlte hian petrol leh diesel leina atan hian pawisa an ren lo hle ni a thudawn a ni a. Mizorama litre khat cheng 94 vel kha litre khatah Rs 150 leh a ai a to pawhin an lei ngam ni a hriat a ni.

<><><>

LANDSLIDES

Leimin avanga Bawngkawn leh Durtlang inkar kawng khar chu wawiin atangin a inchhawka lirthei tlantir tan leh a ni.

Nimin khan Aizawl Bawngkawn atanga Durtlang Leitan panna kawng chho chu leimin avangin Bawngkawn leh Durtlang kawng khar rih a ni a. Vawiin lamah then fai hna ngawrh taka thawh a nih hnu in leimin hlauhawm zual then fai tawh a ni a, lirthei pawh a in chhawk a tlantir leh tan a ni. Thu dawn dan in leimin thenfai hna hi wawiin ah zawh tum a ni. Harsatna thlenna hmun ah hian nimin khan Aizawl bawrsap, District Disaster Management Authority chairman ni baw kaihhruainain AMC, Geology and Mining, PWD leh Department hrang hrang atanga mithiamte'n a hu hovin an endik nghal a.

A hmuna tlawhtute hian a hmun laitu Pu Lalhruaisanga, Chawntlangpui, Lawngtlai District chu rang taka leimin chhonzawm thei laite tifaighal turin an hriattir a. Hna a thawh zawh veleh Aizawl bawrsap/DDMA hnuiaia Quick Response Team te kaihhruaina-in a hmunhna hi tha takin khuh nghal tura ruahmanna siam a ni.

Leiminna hmunah hian lei laih phalna hi AMC chuan a pek loh thu an sawi a; kum khat chuang kal ta-ah khan leiminna chhak deuha a ram hi uluk taka leilaih dan tur khuahkhirhna (condition) siamsakin Pu Lalhruaisanga hi lei laih phalna pek a nih thu an sawi a, phalna pek a nih ang thlap in hma a lak loh thu leh a permit pawh a thih tawh thu an sawi baw.

<><><>

PEACE DAY

Vawiin June ni 30 hi Mizoram 'Remna Ni', kum 1986-a khatih laia India laka inlakhran tuma rammu MNF leh sorkar laipui-in remna thuthlung an ziah champhaphak a ni.

Kum 1966-a MNF-te'n India laka hel a zalenna an sual hnu-ah India Constitution huangchhunga inremna zawngin kum tam tak an inbia a. Tharum thawhna nasa tak karah mipui an rum a, remna a awm theihna atan inbiakna kalpui a ni a, kohhrante an tawngtai bakah pawl hrang hrang, a bikin zirlai pawlte chuan remna leh muanna a awm theihna atan theihtawp an chhuah a. Chutianga beihna avang chuan kha tih lai a Prime Minister Pu Rajiv Gandhi leh MNF president Pu Laldenga te chuan remna an siam thei ta a. June ni 30, 1986 zana Delhi-a Inremna thuthlung ziahna-ah hian sorkar laipui mi pawimawhte bakah Mizoram hruaitu engemaw zat an tel a. Inremna thuthlung hi Pu Laldenga'n MNF aiawhin a hming a ziah hnan a, sorkar laipui aiawhin khatih laia Union Home Secretary Pu R. D. Pradhan leh Mizoram Chief Secretary Pu Lalkhama te'n an hming an ziah ve baw a ni.

Kumin Remna Ni hi Pathianni a a tlak avangin nimin piah Zirtawpni khan a lawmna hun hi Mizoram pumah hman a ni.

<><><>

SENTENCE

Zirtawpni a Aizawl Special Court (Prevention of Corruption) in thiam loh a chantir tak State Bank of India Mission Veng branch a manager hlui Lalkhomang Guite leh Aizawl Sacred Heart Society hotu Gary T. Haokip te hremna chu naktukah Special Court hian a puang dawn.

Lalkhomang Guite, Churachandpur Manipur leh Gary T. Haokip, Aizawl Republic Mual Veng-te hi kum 2006 leh 2007 inkar chhunga a tak awm lo Self Help Group hminga cheng vaibelchhe 2 leh nuai 10 chuang loan pek chhuah kawnga dan bawhchhia a puh an ni a. CBI in an chhui hnu-ah Special Judge Dr. HTC Lalrinchhana chuan Zirtawpni khan IPC section 120-B leh section 420, 468, 471 bakah Prevention of Corruption Act, 1988 section 13 (2) leh section 13 (1)(d) tlawhchanin thiam loh a chantir a. Hemi ni vek hian Central Jail-ah thawn thlak an ni. Naktukah hian court-ah hruai leh an ni ang a, chutah chuan Judge hian a hremna tur a puang dawn a ni.

Selh Help Group 20 hminga loan pek chhuah hi Lalkhomang Guite hian a pawmsak a, Self Help Group aiawh a hming ziahte hi Gary T. Haokip kutziak vek a ni tih hmuhchhuah a ni baw a. Hetianga pawl dinte hi cheng nuai 5 theuh loan pek chhuah an nih lai-in an dawn tur zat hria an awm lova, a dawng tam pawlin cheng nuai khat an dawn lai-in tam tak chuan Rs 50,000 an dawng a. An dawn bang zawng leh Khadi and Village Industries Commission (KVIC)-in a lo do vena tur cheng nuai khat leh sing nga theuh an dawn tur pawh thiam loh chantir takte pahnih hian an insem vek niin CBI chuan an ngai a ni.

<><><>

MAAN KI BAAT

Prime Minister Narendra Modi-a'n ram mipui-ten ram Danpui leh Lok Sabha inthlanpuia democracy kalphung chu rin ngam a ni tih an lan tir thar leh chu lawmawm a tih thu a sawi. Vawiina Akashvani-a Mann Ki Baat hun a hmanna-ah kum 2024 inthlanpui chu khawvela inthlanpui lian ber anih thu sawiin mi vbch 65-in vote an thlak a ni, a ti a, hetiang hi khawvel ram khawiah mah a la thleng ngailo tih sawiin inthlan buaipuitu Election Commission leh midang zawng zawng chungah lawmthu a sawi a ni.

Kumin World Environment Day-a Ek Ped Maa Ke Naam special campaign thlak chungchang tarlangin khawvel ram hrang hranga chengte chu an nute nen emaw an nute hmingin emaw thing tiak phun vek turin a ngen a, kum 10 kalta chhung khan India ramah ramngaw, nasa taka a pun thu sawiin Amrit Mahotsav hman chhung khan Amrit Sarovar sing 6 chuang din a ni, a ti.

Prime Minister chuan thla leh tun ang hunah Paris Olympics tan anih dawn thu pawh sawiin Indian contingent hnenah duhsakna a hlan a, tun tumah hian India tan a wawi khatna tur thil engemawzat a awm thu sawiin table tennis-ah mipa leh hmeichhe team an qualify ve ve a, wrestling leh sakawr chungchuana intihsiak hrang hrangah India team an tel ve dawn a, ram mipuite chu India aiawhte tana tawngtai tur leh au phur turin a ngen a ni.



INDIA WINS T20 WORLD CUP

ICC Mipa T20 Cricket World Cup-ah India-in run 7-a South Africa hnehin an champion a, kum 11 hnua an champion leh vawi khatna a ni.

Nizana Kensington Oval-a final hmuhnawm tak khelhah India team hian an vaw hmasa a, over 20-ah run 176 siamin wicket 7 an hloh a, South Africa hian wicket 8 hlohin run 169 chauh an siam thei a ni. Run 76 siamtu Virat Kohli chu Player of the Match-ah thlan a ni a, game 8-ah wicket 15 la tu, Jaspreet Bumrah-a'n Player of the Tournament award a dawng a ni.



EURO 2024

Euro 2024 pre quarter final chu nizan atang khan khelh tan a ni a, champion lai Italy chu Switzerland-in si 2 faia hnehin quarter final an lut zo lova, Germany-in si 2 faia Denmark hnehin quarter final an lut.

Zanin dar 9.30-ah England leh Slovakia, zanlai dar 12.30-ah Spain leh Georgia-te an inkhel ang.

